

四庫全書

經部

欽定四庫全書

春秋分記卷四十三

宋程公說撰

書二十五

職官書第三

宋

宋殷後天子之事守禮秩加於諸侯文八年經書
宋司馬宋司城亦以天子之後得自命官也成王
命微子統承先王修其禮物由是言之宋之制當

本之殷然諸侯亦不可盡備天子之制殷制見於
書傳無聞焉惟曲禮載天子建天官先六大曰大
宰大宗大史大祝大士大卜典司六典天子之五
官曰司徒司馬司空司士司寇典司五衆天子之
六府曰司土司木司水司草司器司貨典司六職
天子之六工曰土工金工石工木工獸工草工典
制六材五官致貢曰享五官之長曰伯鄭氏注此
蓋殷時制也孔穎達曰殷以大宰為一卿以象天

時司徒以下五卿法地事但大宰既尊故先列大宰而隸屬大宰之官既法於天故同受大名六卿外復別立六府者藏物之處使各主其所掌職也立此六工典制六府之材物五官致貢不言大宰以大宰摠領群職爾此殷制可考之大凡也宋官制較之於舊則有異其詳列下方

孤卿

僖九年傳宋襄公即位以公子目夷為仁使為左

師以聽政於是宋治宋始蓋以左師為政其後有
左右二師襄九年傳二師令四鄉正敬享穎達曰
宋國之法二師分掌其方左右各掌二鄉按周禮
鄉老二鄉則公一人此王制也孤貳公上公之國
則孤一人宋上公而有左右二師是為二孤倣公
孤之名非古也故穎達曰宋國之法譏其更變之
失而違王制耳

文七年傳殺公孫固公孫鄭於公
宮六卿和公室書曰宋人殺其大

夫孔穎達曰此二子亦卿官也下云六卿和公室
六卿之外有此二子蓋是孤卿之官宋上公禮得

有孤嘗考左右師
則孔義於此為差

右師

右師之職於六卿中為貴故華元曰我為右師若

臣之訓師所司也

成十五年

襄九年宋災華閱為右師

討右官官庀其司向戌討左亦如之孔穎達曰百

司府藏屬左右二師故右官庀其司而左亦如之

是府庫之物二師摠令群官所主宋潛立二孤在

六卿之上而右師又孤卿之尊者

左師

左師之職亞於右師僖九年公子目夷為左師以聽政宋始以左師為政卿其後有左右二師則右師為之長僭也

六卿

殷制六卿大宰象天時司徒司馬司空司士司寇法地事宋六卿之次則曰右師左師司馬司徒司城司寇其不合者有四右師左師命名特異一也

大宰列六卿之外二也司徒次司馬之後三也司士之名無聞焉四也然所為戾者多矣

司馬

文八年經宋人殺其大夫司馬司馬主甲兵亦曰司武襄六年傳華弱為司馬平公曰司武而梏於朝難以勝矣謂其主兵也哀十四年傳司馬請瑞兵雖掌於司馬必請瑞而後發尚古制云

司徒

司徒主徒役襄九年傳宋災司徒華臣具正徒杜
預注正徒役徒司徒所主按周禮大司徒掌徒庶
之政令小司徒凡用衆庶則掌其政教凡國之大
事致民孔穎達曰如是年司里所使遂正所納皆
是臨時調民而役之若今之夫役也司徒所具正
徒者常共官役若今之正丁也

司城

文八年經宋司城來奔司城本司空主營壘以武

公名廢為司城十六年傳夫人將使昭公田孟諸而殺之使謂司城去公六卿皆卿官而獨使司城者以司城與司馬相屬其掌營壘則兵亦兼之矣周禮司空鄉師大役則帥民徒而至以考司空之辟田獵徒役亦不盡役謂若一次起發幾人司城必書其人已用幾日至用之後則不再起是其職也

司寇

司寇掌刑罰襄九年傳使樂適庀刑器亦如之杜
預注樂適司寇刑器刑書

卿官非一

大司馬 少司馬 大司寇 少司寇

僖二十二年傳曰大司馬固諫又曰司馬魚固為

大司馬則魚為小司馬矣成十五年向為人為大

司寇鱗朱為少司寇凡此皆具官也

大司馬大司寇為天子之

官宋不當有

大宰 少宰

桓二年傳孔父嘉為司馬督為大宰於時宋其二
卿為政歟至成十五年傳華元為右師魚石為左
師蕩澤為司馬華喜為司徒公孫師為司城向為
人為大司寇鱗朱為少司寇則為七卿矣而復有
向帶為大宰魚府為少宰孔穎達曰少司寇二宰
等六卿外亦是卿官如魯三卿外別有公孫嬰齊
臧孫許但非如六卿世掌國政則宋卿數踰殷制

之舊矣

亦如晉三軍將佐皆世卿外有散位從卿者

大宰所掌

襄九年傳宋災使大宰西鉏吾庀府守杜預注府六官之典按殷制天子建天官先六大而大宰居其一又天子之六府典司六職此言大宰蓋天官之一而府守則六府之職也若如杜言謂為六官之典是與府守異矣孔穎達曰杜以府為六官之典當是六官之典其事載於書故使其守劉炫

以府守為府庫守藏今知不然者以百司府藏已屬左右二師曲禮言五官致貢曰享不及大宰則以大宰摠攝群職故也雖二師各庀其司而大宰摠庀府守

商書伊訓百官摠己以聽冢宰蓋伊尹也冢猶大也說命曰惟說命摠百官孔

安國注冢宰之任則傳說相高宗也宋上公修先王禮物大宰名與冢宰同然據傳乃在六卿外非商制之舊矣

卿

文十四年傳宋高哀為蕭封人以為卿杜預注蕭

宋附庸仕附庸還升為卿孔穎達曰高哀仕於蕭國遂被拔擢升為宋卿是時公子成為右師公孫友為左師華耦為司馬鱗曜為司徒蕩意諸為司城華御事為司寇高哀為卿在六卿之外宋卿蓋非一矣

司城為政卿

襄九年傳宋災樂喜為司城以為政杜預注樂喜子罕也為政卿知將有火災素戒為備火之政按

宋六卿右師為尊司城位居五非政卿也今言司
城為政卿杜預注以為專為救火之政而已然從
此以後歷檢傳文鄭人請賊宋人獻玉拱築臺之
謳削向戍之賞子罕所為皆是政卿之任則子罕
以司城為政卿不特救火之政也孔穎達云宋以
華閱是華元之子以元有大功使閱繼其父耳子
罕賢知故特使為政齊任管夷吾魯任叔孫婁皆
位卑而執國政子罕以司城為政其類此歟

右左官屬

襄九年傳華閱為右師討右官官庀其司向戌討左亦如之杜預注使其其官屬蓋百官有司之分屬於右師左師者

大尹

哀二十六年傳六卿三族降聽政因大尹以達杜預注大尹近官有寵者六卿因之以自通達於君

御士

昭二十一年傳多僚為御士杜預注公御士此年傳又曰子皮遇多僚御司馬而朝則公之御士亦為司馬御士矣

校正

襄九年傳宋災命校正出馬工正出車杜預注校正主馬按周禮校人司馬之屬

工正

襄九年傳命校正出馬工正出車備甲兵庀武守

杜預注工正主車孔穎達曰車馬甲兵司馬之職
周禮司馬屬官有校人而無主車之官巾車車僕
職皆掌車乃屬宗伯昭四年傳載魯叔孫為司馬
與工正書服杜注車服之器工正所書蓋侯國之制司馬兼行
宗伯之事故工正主車而屬焉殷制天子之六工
典制六材其四曰木工注謂輪輿弓廬匠車也工
正或猶木工而其名異乎

司里

襄九年傳伯氏司里杜預注司里里宰釋言曰里
邑也李巡云里居之邑也是里為邑居之名周禮
五鄰為里以五鄰必同居故以里為名里長謂之
宰周禮里宰每里下士一人謂六遂之內二十五
家之長也此言司里謂司城內之民若今城內之
坊里也里必有長不知官名周禮有里宰故以宰
言之非是郊外二十五家之長也使伯氏司此城
內諸里之長故曰司耳

隧正

襄九年傳宋災華臣具正徒令隧正納郊保奔火
所杜預注隧正官名也五縣為隧孔穎達曰此隧
正如天子之遂大夫按周禮有遂人遂師遂大夫
之別遂人職云五家為鄰五鄰為里四里為鄣五
鄣為鄙五鄙為縣五縣為遂遂師各掌其遂之政
令戒禁遂大夫各掌其遂之政令諸侯有鄉遂亦
以郊內郊外別之郊內屬鄉者近於國都司徒自

率以入城郊外屬遂者是郊野保守之民不可全
離所守司徒令遂正量其多少納之於國隨火所
起而奔往救之

鄉正

襄九年傳宋災二師令四鄉正敬享杜預注鄉正
鄉大夫孔穎達曰周禮每鄉卿一人天子六卿即
以卿為之長此傳云二師令四鄉正則四鄉別立
鄉正而二師各摠其二耳周禮卿大夫各掌其鄉

之政教正月之吉受教法於司徒退而頒之於其鄉則鄉正當屬司徒此傳言二師命之者上文右師討右左師討左由宋國之法二師分掌其方左右故云二師命四鄉正也費誓云魯人三郊三遂則魯立三鄉此云命四鄉正則宋立四鄉也周禮鄉為一軍大國三軍宋大國不過三軍而有四鄉者當時所立非正法矣

迹人

哀十四年傳迹人來告杜預注迹禽獸者周禮迹人掌邦田之地政迹之言跡知禽獸之處

祝

襄九年傳宋災祝宗用馬於四墉杜預注祝大祝按殷制天官先六大四曰大祝主天地鬼神之事

宗

同上杜預注宗宗人按殷制天官先六大二曰大宗鄭氏曰周則大宰宗伯皆為六官蓋殷以大宗

為大宰之屬所以明其為殷制也主天地鬼神之事以六大之次言之則宗當居大祝之上

行人

定六年經晉人執宋行人樂祁犁行人使人也周禮有大行人小行人諸侯行人當亦通掌此事

詳見

周魯官制

門官

僖二十二年傳宋師敗績襄公傷股門官殲焉杜

預注門官守門者師行則在君左右周禮虎賁氏
掌先後王而趨以卒伍軍旅會同亦如之舍則守
王閑王在國則守王宮國有大故則守王門諸侯
之禮不得其詳曰門官亦虎賁氏之類故在國則
守門師行則在君左右近公故盡死也殲盡釋詁
文舍人云殲衆之盡也

司宮

襄九年傳令司宮巷伯儆宮杜預注司宮奄臣掌

宮內之事孔穎達曰昭五年傳楚子欲以羊舌肸
為司宮欲加害宮刑以此知司宮奄臣謂奄人為
臣主司宮內周禮無司宮巷伯之名唯內小臣奄
上士四人掌王后之命正其服位鄭玄云奄稱士
異其賢也奄人之官此最為長則司宮如王朝之
內小臣

巷伯

寺人同

襄九年傳巷伯敝宮杜預注巷伯寺人掌宮內之事

孔穎達曰周禮云寺人王之正內五人鄭玄云正
內路寢也釋宮云宮中巷謂之壺孫炎曰巷舍間
道也王肅云今後宮稱永巷巷者宮內道名伯長
也宮內門巷之長周禮內小臣其次寺人知巷伯
猶寺人矣又詩篇名巷伯經云寺人孟子作為此
詩知巷伯寺人一也鄭以巷伯為內小臣既無明
文各以意說

內師

襄二十六年傳寺人惠牆伊戾為太子內師孔穎達曰內師者身為寺人之官公使之監太子內事為在內人之長

衛

卿官

酒誥曰矧惟若疇圻父薄違農父若保宏父定辟圻父司馬農父司徒宏父司空衛三卿官也定四年傳云封康叔少皞之虛聃季授土陶叔授民杜

預注聃季司空陶叔司徒皆衛受於王制之舊春秋衛之政卿世歸甯氏孫氏三卿僅見司徒而復有司寇皆異乎舊矣特采可考者著於篇

卿邑

襄二十七年傳免餘曰唯卿備百邑論語云百乘之家大夫稱家邑有百乘是百乘為采邑之極

司寇

昭二十年傳衛公孟縶狎齊豹奪之司寇杜預注

豹齊惡之子為衛司寇殺衛侯之兄縶春秋以盜書孔穎達曰齊豹衛國之卿又曰齊豹為衛司寇守嗣大夫作而不義其書為盜哀二十五年傳云奪司寇亥政是衛以司寇為卿矣侯國三卿司徒司馬司空是也司空兼司寇之事今衛卿止見司徒而以司寇為政卿非周制矣

司徒

哀十五年傳莊公害故政欲盡去之先謂司徒瞞

成云司徒卿官

少師下於卿

襄二十七年傳獻公以免餘為少師使為卿辭曰
大叔儀能贊大事君其命之乃使文子為卿免餘
辭卿而為少師則衛以少師亞於卿矣

右宰

襄十四年傳右宰穀從而逃歸杜預注穀衛大夫
則右宰衛之大夫也隱四年傳衛人使右宰醜泣

殺州吁於濮石碣使其宰獮羊肩涖殺石厚於陳
衛右宰蓋五大夫之小宰也

御戎戎右

閔二年傳渠孔御戎子伯為右猶晉御戎戎右也
行人

襄十八年經晉人執衛行人石買定七年齊人執
衛行人北宮結以侵衛行人言使人也周禮有大
行人小行人諸侯行人通掌此事

詳見周
魯官制

右公子 左公子

桓十六年傳衛宣公烝夷姜生急子屬諸右公子
為之娶於齊而美公取之生壽及朔屬壽於左公
子杜云左右媵之子因以為號孔穎達曰公子法
無左右明其因母為號公羊稱二國媵之以有二
媵故分為左右說公羊者則言右媵貴於左媵林
栗曰妾媵之子若能操廢立之權則皆自為計矣
宣公何以屬所欲立者而左右公子何以合謀為

黔牟地乎是知洩職二公子者先君之公子而黔牟者宣公之庶子也左右公子者衛之公族分為左右以洩職二公子分領之耳宗盟之長糾合同姓國人所望宣公是以屬其所愛而二公子卒擅廢立之權非左右媵之子而因以為號矣

大士

僖二十八年傳衛侯與元咺訟甯武子為輔鍼莊子為坐士縈為大士杜預注大士治獄官也周禮

命夫命婦不躬坐獄元咥不宜與其君對坐故使
莊子為主又使衛之忠臣及其獄官質正大士衛
之獄官

大史

閔二年傳狄人囚史華龍滑與禮孔以逐衛人二
人曰我大史也實掌其祭周禮大史大祭祀與執
事卜日戒又宿之日與群執事讀禮書而協事書
酒誥矧大史友內史友鄭注大史內史掌記言記

行是內史記言大史記行也衛在春秋無內史之名而大史見於傳衛以王室之命有二史舊矣

祝

襄十四年傳獻公使祝宗告亡祝大祝也按周禮大祝掌六祝之辭以事鬼神示祈福祥求永貞掌六祈以同鬼神示作六辭以通上下親疏遠近辨六號辨九祭辨九攴小祝掌小祭祀蓋達祝辭者

宗

同上宗宗人也按周禮小宗伯掌建國之神位凡國之大禮佐大宗伯凡小禮掌事如大宗伯之儀曰宗者是宗伯之屬孔穎達曰特牲少宰士大夫之祭祀也皆宗人掌其事然則諸是祭神言辭大祝掌之禮儀宗人掌之故祭祀皆祝宗同行其事

大師

襄十四年傳公飲之酒使大師歌巧言之卒章杜預注大師掌樂大夫按周禮春官之屬大師掌六

律六同以合陰陽之聲

寺人

哀十五年傳寺人羅御如孔氏周禮寺人王之正
內五人諸侯寺人亦掌宮內之事而其負不同

蔡

大師

襄二十六年傳楚伍參與蔡大師子朝友子朝以
公族而為大師任亦重矣然蔡侯國而官名大師

僭也

司馬

襄八年傳獲蔡司馬公子燮亦卿官

陳

陳之三卿司徒司馬司空合侯國之制然陳次國也三卿亦汰矣

司徒

襄二十五年傳鄭伐陳入之子美數俘而出司徒

致民孔穎達曰陳國既亂致使民人分散故令陳之司徒招致民人乃還又哀十一年傳陳轅頗為司徒賦封田以嫁公女按周禮司徒掌建邦之土地之圖與其人民之數以土均之法辨五物九等制天下之地征以作民職以令地貢以斂財賦諸侯司徒職掌當亦同故鄭使之致民而陳亦使頗賦封田

司馬

襄二十五年傳鄭入陳陳侯使司馬桓子賂以宗
器杜預注桓子陳之司馬又傳曰司馬致節孔穎
達曰陳國既亂致使官司廢闕符節失亡故令陳
之司馬致符節乃還按周禮掌節屬之司徒而此
以司馬掌之春秋時侯國之制未必盡如周制之
舊

司空

襄二十五年傳司空致地孔穎達曰陳國既亂致

使民人分散故令陳之司空檢致土地乃還按周
官司空掌邦土故使致地也

行人

昭八年經楚人執陳行人干徵師殺之行人使人
也周禮有大行人小行人諸侯行人當亦通掌此

事

詳見周
魯官制

祝

襄二十五年傳祝祓社周禮女巫掌歲時祓除釁

浴巫祝義則同

輿嬖

昭八年傳輿嬖袁克殺馬毀玉以葬杜預注嬖人

之貴者

芋尹

哀十五年傳芋尹蓋陳大夫也按昭七年楚有芋

尹無字孔穎達曰陳有芋尹皆以草名官不知其故

春秋分記卷四十三

欽定四庫全書

經部

程氏春秋分記卷四十五

詳校官監察御史臣李陽枾

給事中臣溫常綬覆勘

總校官原任中允臣王燕緒

校對官主簿臣汪日贊

謄錄監生臣張紹鼎

欽定四庫全書

春秋分記卷四十四

宋程公說撰

書二十六

職官書第四

鄭

六卿

桓十七年傳以高渠彌為卿宣六年傳公子曼滿
欲為卿於時鄭止一卿也至襄二年傳子罕當國

子駟為政子國為司馬是為三卿始有三卿始有
當國為政司馬之別九年傳載鄭公子駢公子發
公子嘉公孫輒公孫薑公孫舍之是為六卿越明
年傳言子駟駢當國子國發為司馬子耳輒為司
空子孔嘉為司徒於是又有司空司徒之號雖以
子耳叙子孔上然司徒之制當上於司空顧所從
言異耳

襄十八年傳子蟜伯有子張從鄭伯子孔子展子

西守此六鄉也十九年殺子孔而子產始為鄉或
謂子產為鄉於十年盜殺發之時則非也二十七
年傳鄭伯享趙孟於垂隴子展伯有子西子產子
大叔二子石從二子石謂伯石公孫段子石印段
也昭三十年傳曰我先君簡公在楚襄二十九年我先
大夫印段實往敝邑之少鄉也鄭多世鄉公子黑
肱以二十二年卒而立段印段蓋已為少鄉而公
孫段為鄉則見於三十年傳言伯有既死始命伯

石為卿以年考之垂隴之享子展伯有子西子產

子大叔印段皆卿而伯石未為卿明矣

二十九年經書公孫

段於年表昭十六年六卿餞宣子子驪子產子大

叔子游子旗子柳子產雖次子驪而其下言子產

拜使五卿皆拜以見子產為政卿若傳所次則叙

事之文非班序也

詳見鄭卿年表

當國

侯國政卿以司徒為上襄二年傳鄭成公卒於是

子罕當國子駟為政為政之名亦異矣又如以當國杜預謂當國者攝君事也禮君薨聽於冢宰不須攝行君事鄭以子罕當國者間於晉楚國家多難喪代之際或致傾危蓋成公顧命使之當國非常法也沈氏云魯襄四歲國家無虞今僖公年雖長大為偏於晉楚故令子罕當國沈氏但以晉楚之偏而言耳自後魯襄十年鄭簡公於是九歲則子駟子孔相繼當國至襄十九年傳又云子展當國

杜預亦謂簡公猶幼然是歲簡公蓋年十八矣國有君而臣曰當國汭而不革非也

政卿

鄭制首則當國之卿而政卿次之按襄二年傳子罕當國子駟為政子國為司馬子駟為政卿也而次於子罕至十年傳子駟當國子國為司馬不復言政卿豈當國兼之耶或司馬任之也十九年傳子展當國子西聽政若子罕子駟同時之制然自

是而下子產大叔駟歆相繼為上卿則曰為政不
復有當國矣當國惟在僖簡之世傳言子氏常掌
國政以為上卿襄二十九年則當國蓋猶掌政而權任
尤專有卿而當國則以為政貳之不然為政者斯
掌國政矣

冢宰

昭元年傳趙孟辭五獻之禮私於子產曰武請於
冢宰矣杜預注冢宰子皮以年考之罕虎自襄二

十九年代其父子展為政卿至是四年曰冢宰謂其為上卿也

司馬 司空 司徒 司寇

鄭上卿曰當國曰政卿若司馬等官則次之襄二年傳子罕當國子駟為政子國為司馬十年傳子駟當國子國為司馬子耳為司空子孔為司徒是司馬次政卿而司空司徒又次司馬也昭二年子產曰不速死司寇將至又十八年鄭火命司馬司

寇列居火道以防姦按侯國三卿司徒司馬司空
鄭有政卿又有司寇亦僭矣以司徒下於司馬司
空則班序又失之

少正

襄二十二年傳晉人徵朝於鄭鄭人使少正公孫
僑對杜預注少正鄭卿官孔穎達曰十九年傳云
立子產為卿知少正是鄭卿春秋時官名變改周
禮無此名按傳十九年子產既為少卿曰少正即

少卿也襄二十五年齊賂晉侯以宗器自六正五吏三十帥皆有賂六正指三軍之六卿則春秋時謂卿為正不特鄭也是時子展當國子西聽政皆為上卿而子產為下卿故二十六年傳子產曰臣之位左四則少正之與下卿義一而名二矣

辨攝卿之疑

襄二十九年經仲孫羯會晉荀盈鄭公孫段云云城杞據經則公孫段於是列為卿矣而三十年傳

伯有死始命伯石為卿伯石即公孫段也前此未
為卿何以得書名氏杜預據傳於城杞下注曰蓋
以攝卿行孔穎達曰文七年傳稱晉使先蔑如秦
逆公子雍荀林父謂蔑曰攝卿以往可也何必子
是知有使大夫攝卿之法故以為證嘗考之經昭
二年書鄭殺其大夫公孫黑此亦以名氏書也其
在元年傳云公孫黑疆與於盟使大史書其名且
曰七子杜預注欲自同於六卿於時六卿謂罕虎

公孫僑公孫段印段游吉駟帶也黑不在六卿之數明年乃以卿書於經與公孫段書法同蓋鄭國於六卿外復有散卿春秋據事實書之苟謂為攝則何以書名氏哉

令正

襄二十六年傳子大叔為令正以請印董父更用子產辭乃獲杜預注主作辭令之正按三十一年傳鄭國將有諸侯之事子產使子羽多為辭令與

裨謚謀可否而告馮簡子使斷之事成乃授子大
叔使行之以應對賓客是以鮮有敗事而語亦云
為命裨謚草創之世叔討論之行人子羽修飾之
東里子產潤色之則子大叔主辭令潤色多出於
子產矣

執訊

文十七年傳鄭子家使執訊而與之書以告趙宣
子杜預注執訊通訊問之官

行人

襄十一年經楚人執鄭行人良霄行人言使人也
周禮有大行人小行人諸侯行人通掌此事

詳見周禮

制官

馬師

襄三十年傳馬師頡奔晉子皮以公孫鉏為馬師
昭七年傳罕朔亞大夫也其官馬師也杜預注大
夫位馬師職

褚師

昭二年傳請以印為褚師杜預注褚師市官孔穎達曰蓋相傳說若無所考然如預言必有源流

嬖大夫

哀五年傳鄭駟秦富而侈嬖大夫也而常陳卿之車服晉亦有嬖大夫孔穎達云下大夫也

開卜大夫

昭十八年傳鄭火子產使公孫登徙大龜杜預注

登開卜大夫

大史

襄三十年傳伯有既死使大夫命伯石為卿辭大史退則請命焉復命之又辭如是三乃受策按周禮內史掌策命蓋右史書言之職禮記正義云大史記行也鄭使大史命伯石為卿皆大夫主爵命以內史闕故也

祝

昭十八年傳鄭火使祝史徙主祔於周廟祝蓋天
祝氏之職

府人 庫人

昭十八年傳鄭火使府人庫人各儆其事曲禮云
在府言府在庫言庫皆是藏財賄之處故使其人
各自儆守以防火周官有大府內府外府天府玉
府泉府而無掌庫之官蓋府庫通言庫亦謂之府
是乃王制也諸侯國政殊故府庫並言

司宮

昭十八年傳鄭火商成公敝司宮杜預注司宮巷伯寺人之官

野司寇

昭十八年傳鄭火使野司寇各保其徵杜預注野司寇縣士也孔穎達曰傳言野司寇則司寇之官在野周禮司寇屬官有縣士掌野司寇是縣士也鄭玄縣士注云地距王城二百里以外至三百里

曰野三百里以外至四百里曰縣四百里以外至
五百里曰都都縣野之地其邑非王子弟公卿大
夫之采地則皆公邑也謂之縣縣士掌其獄焉言
掌野者郊外曰野大摠言之也獄居近野之縣獄
在二百里上縣之縣獄在三百里上都之縣獄在
四百里上如鄭此言采邑之民有獄則采地之長
各自斷之若公邑之見在獄則縣士斷之縣士司
寇屬官所掌在野故傳謂之野司寇也縣士職曰

各掌其縣之民數而聽其獄訟若邦有大役聚衆
廢則各掌其縣之禁令諸侯縣士亦當然

郊人

昭十八年傳鄭火郊人助祝史除於國北周禮鄉
在郊內遂在郊外諸侯亦當然郊人謂郊內鄉之
人

室老宗人

襄二十二年傳鄭子張召室老宗人立段自天子

至卿大夫皆有此官如顧命大保猶室老之類大宗猶宗人之類

曹

上卿

桓九年傳曹太子來朝賓之以上卿杜預注諸侯之適子未誓於天子而攝其君則以皮帛繼子男故賓以上卿各當其國之上卿昭二十三年傳曰列國之卿當小國之君固周制也然則小國之君

乃當大國之卿小國之世子必不得當大國之卿
故知各如其國之上卿耳

卿

成十六年傳子臧盡致其邑與卿而不出

司城為政

哀七年傳曹公孫彊為司城以聽政乃背晉奸宋
宋以武公廢司空曰司城曹國近宋故倣宋司城
之名其曰聽政蓋政卿也

大夫

僖二十八年晉侯入曹數之以其乘軒者三百人也且曰獻狀杜預注軒大夫車言其無德居位者多故責其功狀曹小國而大夫三百人著其濫爵之甚

燕

大夫

昭三年傳燕簡公多嬖寵欲去諸大夫而立其寵

人燕國僻在北陲官制不詳豈大夫即為政者歟
秦

為政

文元年傳秦穆公復使孟明為政猶列國政卿也
不更

成十三年傳獲秦成差及不更女父杜預注不更
秦爵孔穎達曰秦之官爵有此不更之名知女父
是人之名字不更是官爵之號漢書稱商君為法

於秦戰斬一首者賜爵一級其爵名一為公士二
上造三簪褭四不更五大夫六公大夫七官大夫
八公乘九五大夫十左庶長十一右庶長十二左
更十三中更十四右更十五少上造十六大上造
十七馬車庶長十八大車庶長十九關內侯二十
徹侯商君蓋相孝公按傳此年有不更女父襄十
一年有庶長鮑庶長武是春秋世已有此名後世
以漸增之至商君定為二十非商君盡新作也名

之義難得而知秦近夷官制與中國殊

右大夫

襄十一年傳秦右大夫詹帥師從楚子右大夫秦
官爵也秦制有公大夫官大夫五大夫右大夫其
此類矣

庶長

襄十一年傳秦庶長鮑庶長武伐晉秦制有左庶
長右庶長此鮑武並言之豈左右兩庶長乎十二

年傳則云秦庶長無地又止一庶長云

楚

令尹為政卿

尹訓正也楚之官多以尹名而令尹為尊僖二十
七年傳子文治兵於睽子玉治兵於蔿蔿謂子
文曰子之傳政於子玉曰以靖國也杜預注子文
時不為令尹子玉為令尹曰傳政則楚以令尹為
政卿矣宣十二年傳戰於邲令尹南轅反旆行軍

進退令尹亦專之是知為政於內統兵於外皆令尹之任也

令尹司馬莫敖皆卿

哀六年傳可移於令尹司馬楚以令尹為尊而司馬次之又十六年傳云王與二卿士皆五百人當之注二卿士謂子西子期時子西為令尹子期為司馬是令尹司馬皆卿官也又桓十一年傳鬬廉呼莫敖為君孔穎達曰楚呼卿為君則莫敖亦卿

官矣

令尹有左尹有右尹

宣十一年傳左尹子重侵宋令尹蒍艾獵城沂至
成十六年傳令尹將左右尹子辛將右則楚令尹
外又有左右二尹矣

令尹遷授之次

楚卿令尹而司馬次焉莫敖又次焉襄二十二年
傳蘧子馮為令尹則自大司馬而遷也二十五年

子馮卒屈建為令尹則自莫敖而遷也哀十六年
傳勝為白公子西曰楚國第我死令尹司馬非勝
而誰白楚邑縣尹稱公則白公蓋縣尹也杜預注
楚國第謂用士之次第是楚制亦有自縣尹而遷
司馬令尹者矣

大司馬

僖二十六年傳司馬子西止一司馬至襄十五年
傳遂子馮為大司馬公子橐師為右司馬公子成

為左司馬則楚有三司馬而大司馬為尊意其兼

摠左右二司馬之職也

三十年傳申無字曰且司馬令尹之偏而王之四體

司馬以貳令尹亦為政卿

左司馬 右司馬

襄十五年傳公子橐師為右司馬公子成為左司

馬則以右司馬而加左司馬之上也昭三十一年

傳左司馬戍右司馬稽帥師救弦則以左司馬而

加右司馬之上也命官之序若無一定云

左司馬二人

文十年傳宋逆楚子道以田孟諸期思公復遂為
右司馬子朱及文之無畏為左司馬杜預注將獵
張兩甄故置二左司馬而右司馬一人當中央楚
制有大司馬左司馬右司馬今此左司馬復有二
人蓋因獵而置非常法也

令尹司馬沈尹將中軍

僖二十八年傳城濮之戰子玉將中軍子西將左

子上將右子玉時為令尹子西時為司馬中軍為尊故使令尹將之至成十六年傳鄢陵之戰司馬子反將中軍令尹子重將左右尹子辛將右則以司馬將中軍與僖二十八年之制異楚制不常豈以主謀者為中軍帥不復循令尹司馬之職乎然宣十二年邲之戰沈尹將中軍子重將左子反將右時子重為左尹叔敖為右尹沈尹蓋是沈邑之尹而以將中軍又不出於令尹司馬矣

兼令尹司馬二事

哀十六年傳白公勝殺子西子期沈諸梁兼二事
國寧謂時殺令尹司馬沈諸梁兼之兼猶攝耳旋
命寧為令尹寬為司馬則兼二事明非常法

莫敖

桓十一年傳莫敖患之杜預注莫敖楚官名孔穎
達於襄十五年疏曰楚官名臨時所作莫敖之徒
並不可解嘗考楚初有莫敖後來彊盛却有令尹

故令尹之權重於莫敖

尹亦稱宰

宣十二年傳薦敖為宰擇楚國之令典時敖為右尹是右尹亦稱宰矣

大宰

成十年傳晉使糴莩如楚報大宰子商之使也子商即公子辰又襄二十七年傳大宰退告人大宰伯州犂也昭元年傳公子圍即位遂罷為令尹遂

啓彊為大宰下於令尹矣

少宰

宣十二年傳楚少宰如晉師曰豈敢求罪於晉二
三子無淹久杜預注少宰官名嘗考少宰之義無
聞焉詳檢是年傳文隨武子曰薦敖為宰時敖為
右尹右尹為宰義詳見上及聞晉師既濟王欲還嬖人伍參
欲戰令尹孫叔敖弗欲乃南轅反旆未幾則楚少
宰遂如晉師少宰之辭曰無淹久是亦不欲戰矣

楚子又使求成於晉推繹首尾當時楚君志不在戰
其臣贊此議惟右尹叔敖一人及觀少宰之辭若
與敖合而少宰獨失其名豈少宰或屬之右尹乎
傳注略之當考

大師

文元年傳使潘崇為大師且掌環列之尹又哀十
七年傳楚子問帥於大師子穀

師少師

昭十九年傳楚子生太子建使伍奢為之師費無極為少師皆太子之師東宮官也

司敗

文十年傳謂臣將逃臣歸死於司敗又宣四年箴尹歸復命而自拘於司敗司敗猶司寇之職

司徒

宣十一年傳使封人慮事以授司徒杜預注司徒掌役

封人

同上傳杜預注封人其時主城築者

工正

宣四年傳薦賈為工正

右領

昭二十七年傳駟將師為右領右領官名若今之

將領

左史

昭十二年傳左史倚相趨過王曰是良史也子善
視之是能讀三墳五典八索九丘杜預注倚相楚
史名又哀十七年傳子穀曰右領差車與左史老
皆相令尹司馬以伐陳其可使也子高曰帥賤民
慢杜預注右領左史皆楚賤官按右領將領之職
曰賤官猶可左史任一國之史而槩謂之賤官楚
夷也與中國異莫得而詳

正僕人

昭十三年傳因正僕人殺大子祿杜預注正僕大子之近官孔穎達曰正僕人大僕也周禮下大夫一人

御士

襄二十二年傳子南之子棄疾為王御士杜預注御王車者周禮有馭夫御士楚蓋倣此以名官

王馬之屬

昭二十七年傳左司馬沈尹戌帥都君子與王馬

之屬以濟師杜預注王之養馬官屬校人也周禮
校人掌養馬知王馬之屬是王養馬之官屬也校
人職凡頒良馬而養乘之馬一師四圉三乘為阜
阜一趣馬三阜為繫繫一馭夫六繫為廢廢一僕夫
六廢成校校有左右駕馬三良馬之數麗馬一圉
八麗一師八師一趣馬八趣馬一馭夫諸侯六閑
養馬之人多矣此唯養馬不給餘役今亦事急而
徵使之

都君子

同上傳杜預注在都邑之士有復除者都邑之士
以君子為號故知有復除者謂優復其身除其徭
役賈逵云今之律令猶名放課役者為復除是漢
世以來有此言此人或別有功勞或曲蒙恩澤平
常免其徭役事急乃使之耳

大閹

莊十九年傳楚人以鬻拳為大閹謂之大伯使其

後掌之杜預注若今城門校尉官使其子孫常主此官孔穎達曰周禮天官閹人掌守王宮之中門之禁鄭玄云閹人司昏晨以啓閉者刑人墨者使守門秋官掌戮墨者使守門刖者使守固則閹不使刖而鬻拳得為閹者又地官之屬司門下大夫二人掌投管鍵以啓閉國門鄭玄云若今城門校尉主王城十二門此注亦云若今城門校尉官然則鬻拳大臣楚人以其賢使典此職非為刑而役

之其為大閹者當如地官之司門非天官之閹人亦主晨昏開閉通以閹為名焉曰大伯猶長也為門官之長周禮蓋王制楚僭王號倣以名官

冷人

成九年傳鄭人所獻楚囚也問其族對曰冷人也與之琴操南音杜預注冷人樂官

嬖人

宣十二年傳嬖人伍參欲戰嬖人蓋寵嬖者

巫

文十年傳楚范巫裔似杜預注范邑之巫

諸尹

楚官多以尹名尹訓正也令尹為尊見於上別列諸尹之名

箴尹

襄十五年傳屈到為莫敖公子追舒為箴尹以箴尹次莫敖則箴尹任亦重矣又昭四年傳箴尹且

咎城鍾離

工尹

亦曰
鍼尹

楚有工尹氏曰宜齊曰路曰壽曰赤曰麋工尹官
名因以為氏定四年傳王使鍼尹固執燧象以奔
吳師哀十八年傳云工尹勤先君者也杜預注工
尹執燧象則工尹亦曰鍼尹矣又文十年傳王使
子西為工尹

連尹

襄十五年傳屈蕩為連尹養由基為宮廐尹服虔
云連尹射官言射相連屬也若是主射當使養由
基為之何以使由基為宮廐尹棄能不用豈得為
能官人也

宮廐尹

亦曰中廐尹

同上傳掌宮闈之禁又昭元年宮廐尹子哲出奔
鄭六年獲宮廐尹棄疾二十七年殺中廐尹陽令
終

環列之尹

文元年傳使潘崇為大師且掌環列之尹杜預注
環列之尹宮衛之官列兵而環王宮

寢尹

定四年傳昭王寢盜攻之以戈擊王王孫由于以
背受之中肩哀十八年傳惠王曰寢尹工尹勤先
君者也杜預注柏舉之役寢尹吳由于以背受戈
寢尹蓋司王之寢處

門尹

哀十六年傳石乞尹門杜預注為門尹

郊尹

昭十三年傳奪成然邑而使為郊尹杜預注治郊

竟大夫

監馬尹

昭三十年傳使監馬尹逆吳公子

卜尹

昭十三年傳召觀從曰臣之先佐開卜乃使為卜
尹杜預注佐卜人開龜兆按十八年傳鄭子產使
公孫登徙大龜杜預注登開卜大夫則卜尹蓋開
卜大夫之屬楚亦有開卜大夫矣

樂尹

定五年傳以鍾建為樂尹杜預注司樂大夫

縣尹

楚縣尹稱公如白公之類凡以邑名皆縣尹也襄

二十六年傳曰此子為穿封戌方城外之縣尹也

沈尹

宣十二年傳沈尹將中軍杜預注沈或作寢寢縣也孔穎達曰楚官多名為尹沈者或是邑名而其字或作寢哀十八年有寢尹吳由于因解寢為縣名按定四年傳王寢盜攻以戈由于以背受之寢尹蓋司寢非邑名也沈或作寢自是邑名

關緡尹權

莊十八年傳孔穎達曰楚官多以尹為名滅權為
邑使緡為長則尹之義亦與長同

莠尹

昭三十年傳莠尹然左司馬沈尹戍城之

芋尹

昭七年傳楚子為令尹也為王旌以田芋尹無字
斷之孔穎達曰芋是草名哀十五年陳有芋尹
以草名官莫得而詳

吳

大宰

哀七年傳大宰嚭召季康子大宰吳執國政者吳
僭稱王故卿亦僭稱大宰

行人

成七年巫臣寘子狐庸為行人於吳以伐楚定四
年伍員為吳行人以謀楚哀十二年初衛人殺吳
行人且姚行人言使人也周禮有大行人小行人

諸侯行人通掌此事

詳見周
魯官制

春秋分記卷四十四

欽定四庫全書

春秋分記卷四十五

宋 程公說 撰

周天王第一

嗚呼周衰而東禮樂征伐不自天子而自諸侯春秋所書皆傷周之微而尊王以見志也左氏傳經間紀其事今余分系列國推明尊王著周為冠蓋學春秋者當先考一代之變而後及列國之事春秋時列國不一矣反復東周一代之變觀之則其世可知也其事可證也觸

類以推猶指諸掌申叔時之言曰教之春秋而為之聳
善而抑惡焉以戒勸其心教之世而為之昭明德而廢
幽昏焉以休懼其動此分記所以因春秋而序其世也
夫事未有不成功於善而敗於惡治未有不生於明而亂
於昏故雖一人而始終不同况異世哉系其世而別之
跡昭明廢昏以探春秋聳善抑惡之意蓋所以訓也有
天下國家者其鑒於茲

姬姓黃帝之裔后稷封於邠夏之衰后稷子不窋失

官竄於西戎大王去邠居岐文王始興武王克殷都
鎬京十二世至平王東遷維邑更十有三世而敬王
遷成周周有天下八百六十七年四百年在春秋前
二百四十二年在春秋中二百二十五年在春秋後

平王

桓王

莊王

僖王

惠王

襄王

頃王

匡王

定王

簡王

平王

謚灋治而無嘗曰平

名宜曰幽王太子母曰申后王廢申后及太子太子奔申申侯與犬戎弑幽王諸侯共立之即位四十九年魯隱元年
年後三年崩在位五十一年

隱公經元年春王正月

胡安國曰王正月之定於一何也天無二日土無二王家無二主尊無二上道無二致政無二門故議常經者黜百家尊孔氏諸不在六藝之科者勿使並進

此道術之歸於一也言致理者欲令政事皆出中書而變禮樂革制度則流放竄殛之刑隨其後此國政之歸於一也若乃闢私門廢公道各以便宜行事是人自為政繆於春秋大一統之義矣

秋七月天王使宰咺來歸惠公仲子之賵

經三年春三月庚戌天王崩夏四月辛卯尹氏卒秋武氏子來求賻

傳三年春王三月壬戌平王崩赴以庚戌故書之

劉敞曰王實以壬戌崩而赴以庚戌崩則天下皆謂真以庚戌崩也史自當書庚戌聖人雖欲遷正亦不可得豈故傳其偽乎且於春秋何以見平王非庚戌崩乎

夏四月辛卯尹氏卒

公羊傳曰尹氏卒天子之大夫也其稱尹氏何貶曷為貶譏世卿世卿非禮也

鄭武公莊公為平王卿士王貳於虢

王欲分政於虢

鄭伯怨王

王曰無之故周鄭交質致音王子狐為質於鄭鄭公子忽

為質於周王崩周人將畀虢公政四月鄭祭足帥師取溫之

麥秋又取成周之禾周鄭交惡君子曰信不由中質無

益也明恕而行要之以禮雖無有質誰能間之苟有明

信澗谿沼沚本文作之毛蘋蘩藟藻之菜蘩藻聚筐莛

錡釜之器潢汙行潦之水可薦於鬼神可羞於王公而

況君子結二國之信行之以禮又焉用質風有采蘋采

蘋雅有行葦沔酌昭忠信也

宋穆公疾召大司馬孔父而屬殤公焉曰先君舍與夷而立寡人寡人弗敢忘若以大夫之靈獲保首領以没先君若問與夷其將何辭以對請子奉之以主社稷寡人雖死亦無悔焉對曰羣臣願奉馮也公曰不可先君以寡人為賢使主社稷若棄德不讓是廢先君之舉也豈曰能賢光昭先君之令德可不務乎吾子其無廢先君之功八月庚辰宋穆公卒殤公即位君子曰宋宣公可謂知人矣立穆公其子享之命以義夫商頌曰殷受

命咸宜百祿是荷其是之謂乎

冬齊鄭盟於石門尋盧之盟也

盧盟在春秋前

庚戌鄭伯之車

債於濟

隱公傳六年冬京師來告饑公為之請糴於宋衛齊鄭

禮也鄭伯如周始朝桓王也王不禮焉周桓公言於王

曰我周之東遷晉鄭焉依善鄭以勸來者猶懼不訖也

況不禮焉鄭不來矣

新注晉鄭皆姬姓之親周在河內鄭在河南晉在河北至漢世所謂

三河之地者

經七年冬天王使凡伯來聘戎伐凡伯於楚丘以歸

傳八年夏虢公忌父始作卿士於周

經九年春天王使南季來聘

無傳

傳十一年秋王取鄆劉蔣邠之田於鄭而與鄭人蘇忿

生之田溫原絺樊隰郕攢茅向盟

音孟

州陘隕

君子是

以知桓王之失鄭也恕而行之德之則也禮之經也已
弗能有而以與人人之不至不亦宜乎

桓公經四年夏天王使宰渠伯糾來聘

傳四年夏周宰渠伯糾來聘父在故名

劉敞曰武氏子來求賻言世武氏也仍叔之子來聘言幼弱也若糾擅攝父位自取冢宰其貶應甚不得以父在名之而已

經五年夏天王使仍叔之子來聘秋蔡人衛人陳人從王伐鄭

傳五年王奪鄭伯政鄭伯不朝秋王以諸侯伐鄭鄭伯禦之王為中軍虢公林父將右軍蔡人衛人屬焉周公

黑肩將左軍陳人屬焉鄭子元請為左拒以當蔡人衛人為右拒以當陳人曰陳亂民莫有鬪心若先犯之必奔王卒顧之必亂蔡衛不枝固將先奔既而萃於王卒可以集事從之曼伯為右拒祭仲足為左拒原繁高渠

彌以中軍奉公為魚麗之陳先偏後伍伍承彌縫

司馬法車

戰二十五乘為偏以居前以伍次之承偏之失而彌縫闕漏

戰於繻葛命二拒曰旂

旂動而鼓蔡衛陳皆奔王卒亂鄭師合以攻之王卒大

敗祝聃射王中

丁仲切

肩王亦能軍祝聃請從之公曰君

子不欲多上人况敢陵天子乎苟自救也社稷無隕多

矣夜鄭伯使祭足勞王且問左右仍叔之子弱也

經書夏聘

傳釋之於末秋

傳七年秋鄭人齊人衛人伐盟向

二邑名隱十一年王以與鄭

王遷

盟向之民於郊

經八年春天王使冢父來聘

無傳

冬祭公來遂逆王后於

紀

傳八年冬祭公來遂逆王后於紀禮也

劉敞曰若其得禮文何以無天王使祭公乎先儒
論天子親迎多矣或以謂王者無敵不當親迎或
以謂在洽之陽造舟於渭即親迎之事以理言之
謂王者不親迎非也謂造舟親迎此文王事紂時
制不可通於天子矣天子娶后當使同姓諸侯主
其辭命而天子之卿逆之父母之國諸卿送之至
於京師舍而止然後天子親迎以入也凡諸侯來
朝天子猶駕而逆焉況於王后所與共事天地宗

廟繼萬世之重哉其親迎不疑矣

經九年春紀季姜歸於京師

傳九年春紀季姜歸於京師凡諸侯之女行唯王后書

經十有五年春二月天王使家父來求車三月乙未天

王崩

無傳

傳十五年春天王使家父來求車非禮也諸侯不貢車

服天子不私求財

莊王

謚瀆勝敵
克亂曰莊

名佗桓王子桓十五年嗣立明年改元至莊十二年崩在位十五年經傳不書

崩

葬

桓公傳十八年秋周公欲殺莊王而立王子克

莊王弟
子儀

辛伯告王遂與王殺周公黑肩王子克奔燕

初子儀

有寵於桓王桓王屬諸周公辛伯諫曰並后匹嫡兩政
耦國亂之本也周公弗從故及

莊公經元年夏單伯逆王姬秋築王姬之館於外冬王

使榮叔來錫桓公命王姬歸於齊

傳見
內魯

經三年夏五月葬桓王

傳三年夏五月葬桓王緩也

桓十五年三月崩
七年乃葬故曰緩

馮正符曰自崩至葬凡七年甚矣天下之不尊王也

經六年春王正月王人子突救衛

傳見衛

經十一年冬王姬歸於齊

僖王

謚灋小心
畏忌曰僖

名胡齊莊王子莊十二年嗣立明年改
元十七年崩在位五年經傳不書崩葬

莊公傳十六年

初晉武公伐夷執夷詭諸

周大夫
夷采地

為

國請而免之既而弗報

詭諸不報施於蔣國

故子國作亂謂晉人

曰與我伐夷而取其地遂以晉師伐夷殺夷詭諸周公

忌父出奔虢惠王立而復之

惠王

謚灋愛民好與曰惠

名閻僖王子莊十七年嗣立明年改元三年

王子頹立四年王居櫟五年鄭及虢殺

王子頹納王至僖八年

年崩在位二十六年

莊公傳十八年春虢公晉侯朝王王饗醴命之宥

先置醴酒

以幣物宥助

皆賜玉五穀馬三匹非禮也王命諸侯名位不

同禮亦異數不以禮假人

虢公晉侯鄭伯使原莊公逆王后於陳陳嬀歸於京師

實惠后

陳嬀後寵愛少子事在僖二十四年

傳十九年 初王姚嬖於莊王生子頹子頹有寵為國

為之師及惠王即位

莊王孫

取為國之圃以為圃邊伯之

宮近於王宮王取之王奪子禽祝跪與詹父田而收膳

夫之秩

石速秩祿

故為國邊伯石速詹父子禽祝跪作亂因

蘇氏

蘇氏周大夫桓王奪其十邑以與鄭自此不和

秋五大夫奉子頹以伐

王

石連士故不
在五大夫數

不克出奔溫蘇氏奉子頹以奔衛衛師

燕師伐周冬立子頹

傳二十年春鄭伯和王室不克執燕仲父

南燕伯為
伐周故

夏

鄭伯遂以王歸王處於櫟秋王及鄭伯入於鄆遂入成

周取其寶器而還冬王子頹享五大夫樂及徧舞鄭

伯聞之見虢叔曰寡人聞之哀樂失時殃咎必至今王

子頹歌舞不倦樂禍也夫司寇行戮君為之不舉

去歲饑

而況敢樂禍乎奸王之位禍孰大焉臨禍忘憂憂必及

之盍納王乎虢公曰寡人之願也

傳二十一年春胥命於弭夏同伐王城鄭伯將王自圉

門入虢叔自北門入殺王子頹及五大夫鄭伯享王於

闕西辟樂備

備六代之樂

王與之武公之略

界也

自虎牢以東

平王賜武公自虎牢以東後失其地

原伯曰鄭伯效尤其亦將有咎

效子頹舞

樂編

五月鄭厲公卒王巡虢守

音符

虢公為王宮於玆王與

之酒泉

周邑

鄭伯之享王也王以后之輦鑑予之虢公請

器王予之爵鄭伯由是始惡於王冬王歸自虢

傳二十七年冬王使召伯廖賜齊侯命且請伐衛以其

立子頹也

二十八年齊伐衛詳見齊

傳二十八年春齊侯伐衛戰敗衛師數之以王命

傳二十九年冬樊皮叛王

周大夫樊采地

傳三十年春王命虢公討樊皮夏四月丙辰虢公入樊

執樊仲皮歸於京師

僖公經五年夏公及齊侯宋公陳侯衛侯鄭伯許男曹伯會王世子於首止秋八月諸侯盟於首止

傳五年夏會於首止會王太子鄭謀寧周也

劉敞曰此一地也曷為再言首止善是盟也王將以愛易世子桓公為是率諸侯會而盟之王室以安則是正乎不正不正則其嘉之何也諸侯以睦天王以尊後嗣以定一會而父子君臣之道皆得焉故孔子曰正而不譎此之謂也

傳七年冬閏月惠王崩襄王

太子鄭

惡大叔帶之難懼不

立不發喪而告難於齊

經八年春王正月公會王人齊侯宋公衛侯許男曹伯
陳世子款盟於洮冬十有二月丁未天王崩

傳八年春盟於洮謀王室也襄王定位而後發喪

冬王人來告喪難故也是以緩

劉敞曰左氏前年傳曰惠王崩襄王惡大叔之難
懼不立不發喪而告難於齊今年盟於洮謀王室
也然則盟於洮之時諸侯已知王崩矣不應練而
告諸侯也雖曰有難亦不應匿喪彌年左氏既誤

謂王以前年閏月崩見經王崩在今年十二月則

謂襄王定位而後發喪皆不可信

若從傳言襄王定位而後發喪

則春盟洮歸可以告喪矣安有王以去年冬崩春
匿而會洮又至十二月始告喪乎按史記二十五年
惠王崩惠之二十五年則僖之
八年也故取劉敞說而以經為正

襄王

謚灋因事
有功曰襄

名鄭惠王子僖八年嗣立明年改元十六
年以叔帶難出居於鄭十七年入王城至
文八年崩在
位三十三年

僖公經九年夏公會宰周公齊侯宋子衛侯鄭伯許男

曹伯於葵丘

傳見齊

傳十一年夏揚拒泉臯伊維之戎同伐京師入王城焚

東門王子帶召之也

王子帶甘昭公也召戎欲因篡位

秦晉伐戎以救

周秋晉侯平戎於王

傳十二年夏王以戎難故討王子帶秋王子帶奔齊冬

齊侯使管夷吾平戎於王

蘭敏修曰王子帶以戎伐周是率敵讐以攻君父

也豈惟王惡之天下莫不惡之今王討焉而奔齊

齊安然受之夫為天下逋逃主萃淵藪使王討罪人所在齊將不免矣區區使管夷吾仲孫湫聘周以求復之不尊王甚矣

經十有三年夏四月公會齊侯宋公陳侯衛侯鄭伯許

男曹伯於鹹

傳十三年春齊侯使仲孫湫聘於周且言王子帶

言欲復之

事畢不與王言

不言王子帶事

歸復命曰未可王怒未怠其十

年乎不十年王弗召也夏會於鹹謀王室也秋為戎難

故諸侯戍周齊仲孫湫致之

傳十六年秋王以戎難告於齊齊徵諸侯而戍周

傳二十二年富辰言於王曰請召大叔子帶詩曰協比其

鄰昏姻孔云

正月詩

吾兄弟之不協焉能怨諸侯之不睦

王說王子帶自齊復歸於京師王召之也

經二十有四年夏狄伐鄭冬天王出居於鄭

傳二十四年鄭之入滑也滑人聽命

在二十

師還又即衛

鄭公子士洩堵俞彌帥師伐滑王使伯服游孫伯如鄭

請滑鄭伯怨惠王之入而不與厲公爵也又怨襄王之
與衛滑也故不聽王命而執二子王怒將以狄伐鄭富
辰諫曰不可臣聞之大上以德撫民其次親親以相及
也昔周公弔二叔之不咸故封建親戚以藩屏周管蔡
邠霍魯衛毛聃郕雍曹勝畢原鄭郕文之昭也邶晉應
韓武之穆也凡蔣邢茅胙祭周公之胤也召穆公思周
德之不類故糾合宗族於成周而作詩曰棠棣之華鄆
不韡韡凡今之人莫如兄弟其四章曰兄弟閔於牆外

禦其侮如是則兄弟雖有小忿不廢懿親今天子不忍
小忿以棄鄭親其若之何庸勲親親暱近尊賢德之大
者也即聾從昧與頑用嚚姦之大者也棄德崇姦禍之
大者也鄭有平惠之勲

平王東遷晉鄭是依
惠王奔虢鄭納之

又有厲宣

之親

鄭始祖桓公友周
厲王子宣王母弟

棄屢寵而用三良

七年殺屢臣
中侯十六年

殺寵子子華三良
叔詹堵叔中叔

於諸姬為近四德具矣耳不聽五聲

之和為聾目不別五色之章為昧心不則德義之經為
頑口不道忠信之言為嚚狄皆則之四姦具矣周之有

懿德也猶曰莫如兄弟故封建之其懷柔天下也猶懼有外侮扞禦侮者莫如親親故以親屏周召穆公亦云今周德既衰於是乎又渝周召以從諸姦無乃不可乎

民未忘禍王又興之

前有子頽之亂中有叔帶召狄

其若文武何王弗

聽使頽叔桃子出狄師夏狄伐鄭取櫟王德狄人將以其女為后富辰諫曰不可臣聞之曰報者倦矣施者未厭狄固貪恠王又啓之女德無極婦怨無終狄必為患王又弗聽初甘昭公

王子帶

有寵於惠后將立之未及而

卒昭公奔齊王復之又通於隗氏

王所立
狄后

王替廢隗氏

顏叔桃子曰我實使狄狄其怨我遂奉大叔以狄師攻

王王御士將禦之王曰先后其謂我何

惠后

寧使諸侯圖

之王遂出及坎欲國人納之秋顏叔桃子奉大叔以狄

師伐周大敗周師獲周公忌父原伯毛伯富辰王出適

鄭處於汜大叔以隗氏居於溫

冬王使來告難曰不

穀不德得罪於母弟之寵子帶鄙在鄭地汜敢告叔父

臧文仲對曰天子蒙塵於外敢不奔問官守王使簡師

父告於晉使左鄢父告於秦天子無出書曰天王出居

於鄭辟母弟之難也

叔帶即襄王同母弟

天子凶服降名禮也鄭

伯與孔將鉏石甲父侯宣多省視官具於汜而後聽其私政禮也

程頤曰襄王避帶之亂越在諸侯之境書曰天王出居於鄭自取之也王者以天下為家故曰自周無出示無外也春秋之時王者政令僅行於境內才出畿甸即非王有故書曰出聖人之法撥亂世反之正則

曰普天之下莫非王土非諸侯所得專也故書曰居傳二十五年春秦伯師於河上將納王狐偃言於晉侯曰求諸侯莫如勤王諸侯信之且大義也晉侯辭秦師而下三月甲辰次於陽樊右師圍溫大叔在溫故左師逆王夏四月丁巳王入於王城取大叔於溫殺之於隰城戊午晉侯朝王王享醴命之宥請隧弗許曰王章也未有代德而有二王亦叔父之所惡也與之陽樊溫原欒茅

之田

詳見晉

經二十有八年夏五月公會晉侯齊侯宋公蔡侯鄭伯
衛子莒子盟於踐土陳侯如會公朝於王所冬公會晉
侯齊侯宋公蔡侯鄭伯陳子莒子邾人秦人於溫天王
狩於河陽壬申公朝於王所晉人執衛侯歸之於京師
經二十有九年夏六月會王人晉人宋人齊人陳人蔡
人秦人盟於翟泉

傳見
晉

經三十年冬天王使宰周公來聘公子遂如京師遂如

晉

傳三十年冬王使周公閱來聘饗有昌歠

在感切

白黑

形鹽

昌歠

辭曰國君文足昭也武可畏也則有備物之

饗以象其德薦五味羞嘉穀鹽虎形以獻其功吾何以堪之

文公經元年春天王使叔服來會葬

倍公

夏四月天王使

毛伯來錫公命叔孫得臣如京師

經三年夏五月王子虎卒

五月從赴

傳三年夏四月乙亥王叔文公卒來赴弔如同盟禮也

與僖公同
盟翟泉

經五年春王正月王使榮叔歸含且賵三月王使召伯

來會葬

成風

經八年秋八月戊申天王崩冬十月乙酉公孫敖如京
師不至而復丙戌奔莒

傳八年秋襄王崩冬穆伯如周弔喪不至以幣奔莒

頃王

謚瀟慈仁
和民曰頃

名王臣襄王子文八年嗣立明年改元
至十四年崩在位六年經不書崩葬

文公經九年春毛伯來求金

以共葬事

二月叔孫得臣如京

師辛丑葬襄王

傳九年春王正月毛伯衛來求金非禮也不書王命未葬也二月莊叔如周葬襄王

經十年秋七月及蘇子盟於女栗

傳十年秋七月及蘇子盟於女栗頃王立故也

傳十四年春頃王崩周公閱與王孫蘇爭政故不赴凡

崩薨不赴則不書禍福不告亦不書懲不敬也

秋七月周公將與王孫蘇訟於晉王叛王孫蘇而使尹氏與聃啓訟周公於晉趙宣子平王室而復之

匡王

謚瀆貞心
大度曰匡

名班頃王子文十四年嗣立明年改元至宣二年崩在位六年

文公傳十七年秋周甘馱敗戎於邲垂乘其飲酒也

宣公經二年冬十月乙亥天王崩

無傳

定王

謚瀆大慮
慈民曰定

名瑜頃王子宣二年嗣立明年改元至成五年崩在位二十一年

宣公經三年春王正月葬匡王

無傳四月而葬速

傳三年春楚子

莊王

伐陸渾之戎遂至於維觀兵於周疆

定王使王孫滿勞楚子楚子問鼎之大小輕重焉

亦欲偏周

取天

對曰在德不在鼎昔夏之方有德也遠方圖物貢

金九牧鑄鼎象物百物而為之備使民知神姦故民入

川澤山林不逢不若

順也

魑魅罔兩莫能逢之用能協於

上下以承天休桀有昏德鼎遷於商載祀六百商紂暴

虐鼎遷於周德之休明雖小重也其姦回昏亂雖大輕

也天祚明德有所底止成王定鼎於郊鄠卜世三十卜年七百年所命也周德雖衰天命未改鼎之輕重未可問也

劉安世曰書傳之間大有害事者若卜世卜年是也先王之有天下日慎一日而懼其不終故書曰天難諶命靡常此文武周公之意豈預為歷數久長之說以告子孫使子孫恃天命恣強虐而不懼危亡乎曰若是則王孫滿之妄乎曰蓋有說矣當楚子之問

鼎王室之威不能制也天子之德不能懷也故假天命神告之事以拒之且曰卜世三十卜年七百而今尚未也楚子問鼎之時定王之世也自武王至是二十四世凡四百餘年矣古人唯司馬遷窺見其意故周紀云王使王孫滿應設以辭楚兵乃去蓋設之以事以拒其言也不然則文武周公之意荒矣

傳六年夏定王使子服求后於齊冬召桓公逆王后於齊

經九年夏仲孫蔑如京師

傳九年春王使來徵聘

徵召也言周微

夏孟獻子聘於周王以

為有禮厚賄之

經十年秋天王使王季子來聘

傳十年秋劉康公來報聘

經十有五年夏六月王札子殺召伯毛伯

傳十五年夏六月王孫蘇與召氏毛氏爭政使王子捷

王札子

殺召戴公及毛伯衛卒立召襄

經十有六年夏成周宣榭火

傳十六年夏成周宣榭火人火之也凡火人火曰火天
火曰災

秋為毛召之難故王室復亂王孫蘇奔晉晉人復之冬
晉侯使士會平王室定王享之原襄公相禮穀烝

升也
詳見

禮樂
書

成公經元年秋王師敗績於茅戎

傳元年春晉侯使瑕嘉平戎於王

平文十七年
邲垂之役

單襄公

如晉拜成劉康公徼戎將遂伐之

戎平還欲要其無備

叔服曰背

盟而欺大國此必敗背盟不祥欺大國不義神人弗助

將何以勝不聽遂伐茅戎三月癸未敗績於徐吾氏

茅戎

之別秋王人來告敗

經五年冬十有一月己酉天王崩

傳五年冬十一月己酉定王崩

簡王

謚灋一德不懈曰簡

名夷定王子成五年嗣立明年改元至襄元年崩在位十四年

成公經八年秋七月天子使召伯來賜公命

傳十一年夏周公楚惡惠襄之偏也

惠王襄王之族

且與伯與

爭政不勝怒而出及陽樊

晉地

王使劉子復之盟於鄆而

入三日復出奔晉

秋晉郤至與周爭鄆曰王命劉康

公單襄公訟諸晉郤至曰溫吾故也故不敢失

郤氏舊邑劉

子單子曰昔周克商使諸侯撫封蘇忿生以溫為司寇

與檀伯達封於河蘇氏即狄又不能於狄而奔衛

衛十年

襄王勞文公而賜之溫

僖二十年

狐氏陽氏先處之而後

及子若治其故則王官之邑也子安得之晉侯使卻至

勿敢爭

新注爭田而訟
諸晉見周室衰

經十有二年春周公出奔晉

傳十二年春王使以周公之難來告書曰周公出奔晉
凡自周無出周公自出故也

經十有三年春三月公如京師

傳十三年春三月公如京師及諸侯朝王遂從劉康公
成肅公會晉侯伐秦成子受賑於社不敬劉子曰吾聞

之民受天地之中以生所謂命也是以有動作禮義威儀之則以定命也能者養之以福不能者敗以取禍是故君子勤禮小人盡力勤禮莫如致敬盡力莫如敷篤敬在養神篤在守業國之大事在祀與戎祀有執膳戎有受脰神之大節也今成子惰棄其命矣其不反乎
夏五月成肅公卒於瑕

經十有五年春三月晉侯執曹伯歸於京師

經十有六年秋公會尹子晉侯齊國佐邾人伐鄭曹伯

歸自京師

經十有七年夏公會尹子單子晉侯齊侯宋公衛侯曹伯邾人伐鄭冬公會單子晉侯宋公衛侯曹伯齊人邾人伐鄭

襄公元年秋九月辛酉天王崩

無傳

靈王

謚濫不勤
成名曰靈

名泄心簡王子襄元年嗣立明年改元至二十八年崩在位二十七年

襄公經二年春王正月葬簡王

無傳五月而葬速

經三年夏六月公會單子晉侯宋公衛侯鄭伯莒子邾子齊世子光己未同盟於雞澤

傳五年春王使王叔陳生愬戎於晉

戎陵競周室告愬於盟主

晉人

執之士魴如京師言王叔之貳於戎也

王叔反有二心於戎失奉使之

義

傳十年冬王叔陳生與伯輿爭政王右伯輿助右王叔陳

生怒而出奔及河王復之

欲奔晉

殺史狡以說焉

說王叔

不

入遂處之

處之河上

晉侯使士匄平王室王叔與伯輿訟焉

王叔之宰與伯輿之大夫瑕禽坐獄於王庭士甸聽之
王叔之宰曰華門閨竇之人而皆陵其上其難為上矣
言伯輿微賤之家瑕禽曰昔平王東遷吾七姓從王牲用備具

王賴之而賜之駢旄之盟曰世世無失職若華門閨竇
其能來東底乎

底至也

且王何賴焉今自王叔之相也政

以賄成而刑放於寵官之師旅不勝其富吾能無華門
閨竇乎唯大國圖之下而無直則何謂正矣范宣子曰
天子所右寡君亦右之所左亦左之使王叔氏與伯輿

合要王叔氏不能舉其契

要契之辭

王叔奔晉不書不告也

單靖公為卿士以相王室

代王叔

傳十二年冬靈王求后於齊齊侯問對於晏桓子桓子

對曰先王之禮辭有之天子求后於諸侯諸侯對曰夫婦所生若而人妾婦之子若而人無女而有姊妹及姑姊妹則曰先守某公之遺女若而人齊侯許昏王使陰里結之

經十五年春劉夏逆王后於齊

傳十五年春官師從單靖公逆王后於齊卿不行非禮也

經二十有四年冬叔孫豹如京師

傳二十有四年冬齊人城邾

王城齊莊叛晉求媚於天子

穆叔如周

聘且賀城

經二十八年冬十有二月甲寅天王崩

傳二十八年冬十一月癸巳天王崩未來赴亦未書禮

也

嫌時已聞喪當書

十二月王人來告喪問崩日以甲寅告故

書之以徵過也



春秋分記卷四十五